

中興禮書

中興禮書第二百二十三卷

賓禮二

正旦金國使人入賀

紹興三年十二月二十五日輔臣進呈金使李永壽等
正旦入見故事百官俱入上日全盛之時神京會同朝
廷之尊百官之富所以夸示夷狄今暫駐於此事從簡
便舊日禮數豈可盡行無庸俱入兼元日亦未嘗受賀
也

十三年十一月二十四日主管往來國信所言金國賀
正旦使副來程於盱眙軍排筵管待未審回程合不合
筵待詔內侍省差使臣三員沿路賜御筵一員於平江
府排辦一員於鎮江府一員於盱眙軍

十二月五日知臨安府張叔獻言主管往來國信所報舊例大遼國賀正旦使人赴闕開封府少尹一員往陳橋迎接茶酒於班荆館御賜筵酒果入門赴驛本府契勘已降指揮於赤岸賜御筵其本府東倉排辦接見茶酒係在御筵之後即與舊例不同詔於臨平鎮排辦二十二日詔金國賀正旦人使到闕赴宴等坐次令與宰臣相對稍南使副上下馬於執政官上下馬處三節人從並於宮門外上下馬

二十三日詔金國賀正旦人到闕已降指揮赴宴等坐次令與宰臣相對稍南其立班於西班與宰臣相對立仍權移西班使相對東壁宰臣之東

二十五日閤門言使人朝見等如值雨沾濕依儀及乞

隨宜事今具下項 紫宸殿朝見 一紫宸殿朝見欲
就東廊朵殿下引見使下所有起居班并館伴使副並
於南廊起居如儀 一宰執依常日起居升殿奏事訖
於殿上分東西侍立候人朝見訖退 一報無公事於
東朵殿垂拱殿再生茶酒 一使人欲就隔門上奏萬
福謝坐訖引分兩廊 一垂拱殿隔門上教坊起居及
看蓋人謝訖分由兩廊升殿於隔門上設樂酌酒詔依
二十六日尚書省言昨降指揮使人就常御殿朝見入
出皇城北門其紫宸殿朝見入出門候指揮詔入出皇
城北門
同日閣門言依儀使人紫宸殿朝見設仗文武百僚合
赴起居詔依

二十七日詔全國人使朝見訖垂拱殿茶酒都管令於東西廊上第一間歇空稍前坐

同日全國遣元顏羣馬諤等來賀明年正旦見于紫宸殿禮物金注梳一副金盞四隻金盤一面雜色綾羅紗穀三百段馬六匹宰執進呈國書訖上曰今次使人來事皆正大體既正則小節不足較觀虜人之意和議必須監久

是年和議方定使命自此至三十一年往復不絕正旦禮物數目並無增損

三十日詔全國使人紫宸殿宴其諸軍統制統領正任以上合赴坐官營寨多在城外令免赴坐今後准此同日客省言正旦使人朝見與將來朝辭各殿門外賜酒食合差伴賜官詔各就差館伴官伴賜同日問門言使人入賀并宴及朝辭入出門戶上下馬並依朝見

日已降指揮及將來紫宸殿宴如值雨依在京例使人就驛賜宴臣僚等酒食打散至日參知政事就驛押宴詔依

十四年正月一日宴金國人使于紫宸殿

文臣權侍郎以上武臣判

史以上赴聖台後逐年正旦賜宴防此

六日上諭宰臣曰前日虜使必欲射朕這館伴諭以兩國講和正哉干戈索弓矢之時不欲較勝負今使人須要射不得不從况南方卑濕不宜弓矢可於勝負之間不須較計而虜使射不勝緣先曾諭意亦大嘉

十二月十日閤門言將來正旦使人到闕見辭并宴并前二日應奉官司赴逐殿習儀詔依

自後仿此

二十五日詔自今後每遇紫宸殿使人見辭更不排設

逍遙平輦

十七年六月三日詔金國使人見辭等如遇垂拱殿集英殿紫宸殿階下立班於拜處宰臣使相使人令儀衛司鋪壇今後准此

十八年正月一日宰執進呈淮南轉運副使錢端禮言本路應辦國信使宿食程頓乞省併只作一十二頓宣諭曰如有不須排備去處自宜省并亦免官吏乘時騷擾

十一月十二日禮部太常寺言來年正月六日使人朝辭用樂係在上辛祠官致齋之內欲依治平故事用樂詔依自後使人見辭等如在祠官致齋之內並依故事用樂并具祀上帝門

十二月十五日詔金國使人到闕令殿前司選差曾經

慣熟喝箭殿侍四人充玉津園射弓祇應

十九年十一月二十二日禮部言主管往來國信所陳永錫等檢會在京舊例北使赴闕及人從身故體例乞下有司看詳本部今欲依具到體例并勘會到事理施行 詔令國信所照會 太常寺開具到王旦接送伴語錄元祐七年契丹賀正旦使左番僚賀太皇太后耶迪端禮右番蕭什彥劉彥國來程六年十二月五日到瀛州左番太傅律迪遣人傳語欲得醫者看永并要兒輜十五日到磁州滏陽驛中使王構押到醫官楊文蔚過位迪立聽口宣看脉十六日早離磁州上馬行次高端禮云左番太傅不安蒙朝廷遣醫一行人皆放心兼來得甚速必是朝廷留意二十四日入內內侍省高班

蘇世長傳宣館伴所北朝人使耶律迪見遽不安與放
免朝見其例就驛交割七年正月二日入內內侍省高
品康承錫傳宣館伴所入大遼國使人耶律迪見患所
有五津國本人躬弓例物令就驛賜仍免次日引謝六
日入內侍黃門邵琦傳宣館伴所入大遼國使人耶律
迪為患與放朝辭所有例物令就驛交割又入內東頭
供奉官張士良傳宣宣問耶律迪春寒安樂知所患未
得一向康和入辭不得已差醫官元瑋楊文蔚二人隨
行看醫調治途中初在加愛耶律迪令人答小人上感
聖恩願太皇太后皇帝萬萬歲尋令在省副使代跪謝
表一道與天使七日入內東頭供奉官馮世寧傳宣宣
問耶律迪春寒安樂今特賜湯藥一銀合御使酒一十

瓶途中宜加調護耶律迪令人答自到館累蒙聖恩差
天使宣問賜湯藥物及差到醫官上感聖恩只是為患
不賸見得聖人心裏煞不好左番副使代跪謝表與天
使是日回程到班荆館耶律迪乘轎子先行九日到滑
州通津驛晚遣人傳語為左番太傅昏困欲來日住一
日往復一兩次遂許之十日住滑州至晚蕭仲奇差人
傳語左番太傅身亡告令聲鍾及請僧於靈前道場十
二日住滑州送伴呂希績李昌世過位澆奠與蕭仲奇
等相見遣人送耶律迪襖衣銀裝棺及棺衣奠酒銀器
等物既斂希績等又過位奠醑及慰蕭仲奇等相十三
日住滑州希績等過位澆奠與高端禮等相見相次遣
人持迎賻贈下饗銀器及三節人從孝贈等與之端禮

等致謝晚中使王構至齋仲奇等詣書并迎本家密賜
仲奇等受賜拜表謝恩如儀十四日早離滑州過河馬
上高端禮謂送伴李昌世云耶律廸不幸物故諸事皆
感激昨日蒙朝廷差中使降詔撫問及密賜耶律太傅
本家上荷天恩唯祝二聖聖壽無疆也十九日早離驛
馬上相揖次希績等諭蕭仲奇等昨日得朝廷文字皇
帝為耶律太傅報視朝一日北副使劉彥國云左番太
傅雖九泉之下亦有榮耀本寺契勘上項事理內襖衣
數目今按殷梁氏云襖者衣服之名故送死之衣亦名
襖也衣多少之數喪大記小歛之衣皆十九稱大歛之
衣大夫五十稱士三十稱歛衣稱數同則所歸襖服亦
當有異但所歸者未必具其稱先儒無說不敢斷其多

也又按喪大記袍必有表不禪衣必有裳謂之一稱社預曰衣卑復具曰稱今來若北使有似此身故之人其大使欲賜五十稱副使欲賜三十稱竊緣古今衣制不同今參酌大使折賜綾羅絹各五十疋副使折賜綾羅絹各三十疋其銀柴棺及棺衣各合用一件內奠酒器係銀合用注梳一副銀盞三副係三次澆奠銀棧茶盞耗一副其大使身亡合得賻贈欲賜絹六百疋布一百五十疋生白龍腦一斤燭六十條濕香茶各三十斤酒六十瓶副使欲賜絹五十疋布一百五十疋濕香茶各三十斤酒六十瓶下饗奠酌銀器大使賜銀三百兩副使賜銀二百兩若副使身亡大使合得孝贈欲賜絹三百疋布一百五十疋大使身亡副使賜絹二百疋布一

百五十疋三節人從李贈上節絹一十疋中節絹七疋
下節絹五疋其密賜本家五疋合聽臨時指揮又元祐
三年七月三日本所據隨從接伴大遼國賀正成節人
使指使楚珣等申六月二十三日堯山縣驛人使傳語
有下節契丹一名身死准條比使三節人沿路身死便
仰焚燒造木匣絹袋盛貯國殖候回日分付仍作朝廷
意度隨處州軍取係省絹三十疋錢三十貫接送伴使
副分付人使充賜與身亡人從李贈又條三節人沿路
及到闕身亡應合給例物並賜與又紹興八年十一月
二十三日金國泛使張通古等過界當日人使呼索轎
子一項前去至青陽驛宿泊問得係上節書狀官承議
郎行臺尚書省主簿魏千運一名見患不安二十八日

到高郵軍本人身亡委高郵知軍劉舜士營辦棺木盛
斂了當請本軍僧衆作佛事誦誦經文設香燭酒果絲
贈等供養於公詔院用塲反攢次日差提舉官趙時前
去澆尊及留錢委本軍知軍請僧續作節次齋七追薦
九年正月四日到闕在館賜使人張通古等金銀數內
身故書狀官魏千運賜銀六百兩二十三日回程至高
郵軍張通古等傳語前時死者魏千運恐將來出陸擡
擡不行不若燒化了伴送副使莫將等傳語甚好遂令
高郵軍燒化用小棺木盛去本寺契勘數內三節人身
亡支賜數目今照得止有魏千運一名體例今參酌將
來若有上節到闕或回程身亡之人欲賜銀三百兩如
未到闕在沿途身亡依魏千運體例上賜銀六百兩其

中節人比附上節減半給銀三百兩下節人却比附中節減半給銀一百五十兩所有中下節人沿路及到關合給例物並依前項本所條例支給

二十年五月二十六日尚書省言使人往回渡江不測值風竊慮拘於排日程頓濟渡不便詔令後使人渡江值風不拘所定日分候濟渡却令兼程進發

二十二年六月一日主管往來國信所言今重別參酌到全國都管上節到關未回程身亡支賜都管欲賜銀五百兩上節四百兩其都管上節沿路到關應合給例並所有支賜銀如到關下左藏庫支供令館伴使副給賜沿軍下轉運司應副令接送伴使副給賜並作朝廷意度其中下節等並依紹興十九年十一月已降指揮

施行三節人孝贈錢絹緣已有支賜銀依近降指揮更不支給詔依

二十五年十二月二十七日閤門言人使到闕為闕宰臣依舊例權移孟中厚東壁押班宴日令通少傅信安郡王孟忠厚已下謝名赴宴詔依

二十六年正月十日閤門言開府儀同三司係子逵高坐官今後使人到闕並賜羅花詔依

二十八年十二月二十五日詔使人見辭入賀赴宴排設儀仗教坊等並令入出麗正門

同日國信所言自來使人朝見禮物檐床鞍馬於紫宸殿門以西至過道門外一帶陳列候入殿進呈今來使經由新路入皇城南門若仍舊陳設有碍館伴使人下

馬及入殿班路除國書合在紫宸殿門上其餘禮物等
檐床等欲乞於紫禁殿門內兩壁陳列其使人應入內
經由上下馬處及待班幕次伏取聖旨詔金國使副依
宰相上下馬及於麗正門外西廊從北第一至第三間
為待班幕次餘依

二十九年十一月十九日禮部太常寺言准都省札子
御厨翰林儀鸞司奏逐司每遇金國使人到闕入內見
辭殿內筵宴合排辦金裝釘御飯床茶金銀器皿并臣
僚對御器皿等及絞縛垂拱紫宸兩殿綵結山樓及殿
上設朱紅漆御座黃羅席褥金銀出香獅蠻宰執等錦
氍毹并殿上兩廊黃緋絹衣額御幕銅絲畫屋舞袖鸞鳳
孔雀并三節人從紅纈羅座褥及應奉人紅纈羅衫金

銀銀雙鹿兒腰帶緣今來大行皇太后上仙將來正旦
使人到闕逐司竊慮顏色物件內有妨碍名色未敢排
辦奉聖旨令禮部太常寺討論申尚書省今討論將來
賀正旦人使到日依典故更不賜宴止就驛陽御筵已
討論申請外如見辭日賜茶酒依典故不合舉樂其山
樓亦不合結縛所有御前裝設如係紅繡等顏色欲乞
改用黃素臣僚錦壑欲乞改用紫素其餘金銀器皿及
祇應諸色人衣著之類並合如常詔依

二十一日尚書省劄子勘會金國賀正旦使副非晚過
界所有接伴館伴相見并合著衣服及朝見禮儀詔令
禮部太常寺問門國信所同共討論申尚書省取旨今
討論下項 一接伴相見服色契勘接伴使副合於十

二月十日與金國賀正旦人使相見係在顯仁皇太后
朱附廟之前依典故合服常服黑犀帶不佩魚皂鞵鞵
去絨座更令接伴使副量度施行 一入界後逐處賜
宴檢准明道二年章獻明肅皇后上仙雄州上言契丹
使回迎送合與不合舉樂詔不舉樂今來賀正旦使人
過界依上件典故逐處合賜宴唯不舉樂 一館伴相
見并朝見服色近降指揮顯仁皇太后未祔廟前百官
常服黑帶候虞祭畢日別具申請 一見辭賜茶酒檢
准元豐三年三月詔大遼賀同天節使人見辭止賜茶
遣執政官就驛押賜御筵以慈聖光獻皇后喪期之內
又景德二年十一月宴契丹使於崇德殿不舉樂以明
德皇后喪制今來賀正旦人使見辭依元豐三年典故

合宣坐賜茶及差執政官就驛押賜御筵若賜茶酒即
合依景德二年典故不舉樂 一見辭禮儀據閣門具
到朝見使副四拜起居不舞臨謝面天顏兩拜謝沿路
茶藥御筵等兩拜唱賜例物跪受三拜朝見畢出服所
賜再引入賜茶上下各兩拜謝宣問兩拜賜茶訖退舍
例并從人各四拜起居唱賜例物跪受三拜今檢照故
例并比附見行儀範擬定朝見使副四拜起居引出班
歸位兩拜再引出班謝沿路茶藥等歸位兩拜唱賜跪
受三拜服所賜再引出班謝沿路茶藥等歸位兩拜唱賜
茶訖退舍利并從人各四拜朝見唱賜例物跪受三拜
朝辭使副兩拜起居賜茶上下各兩拜朝辭唱賜例物
跪受三拜出服所賜再引入當殿兩拜訖升殿傳語受

書訖退舍例并從人各四拜起居唱賜例物跪受三拜
今來檢照故例并比附見行儀範擬定辭朝使副兩拜
起居賜茶上下各兩拜朝辭唱賜跪受三拜出服所賜
例兩拜引入殿傳語受書訖退舍例并從人各四拜
朝辭唱賜例物跪受三拜 一正旦日入賀檢准紹聖
元年正月一日以宣仁聖烈皇后喪期內大遼賀正旦
人使指西上閤門拜表訖歸驛遣兩府押賜御筵今被
依上件典故興行 一人使躬弓宴及諸天竺等燒香
等檢准元祐八年十二月大遼賀正旦使令館伴引赴
相國寺集禧觀等處燒香及賜躬弓宴不用樂今欲依
上件典故施行詔依

十二月六日禮部太常寺言信國所申檢討到元祐八

年正月接伴所故例一件內沿路除賜宴聚食廳館及接伴位並用青碧陳設外其人使一行宿位等處即且令仍舊陳設奉聖旨在京并沿路帳設什物除人使宿位仍舊外其公廳陳設送迎裝著即檢會雄州奏請降到元豐二年十一月十八日指揮陳設之類並用素青碧山水圖幃竊慮人使經過州府迎送鋪設不一乞下應人使來往州府依上件體例施行今未有該載陳設恐妨赤岸班荆館都亭驛等處釘設欲乞下有司討論施行後批送部同太常寺看詳申尚書省今看詳金國賀正旦人使入界其經過州府陳設除人使宿位依故事所有賜宴聚公廳并接伴位並用青紫如辦不及處許隨宜審度其赤岸班荆館都亭驛等處陳設乞並

依此詔依

十一日禮部太常寺言將來人使到闕日請皇帝御坐拱殿所有排設黃麾角仗欲乞權免止增添禁衛人排立詔依

十七日問門言金國賀正旦使人朝見日後殿起居班絕垂拱殿坐權令宰執侍從日參官一班次使相至刺史一班次馬步軍都指使以下一班次馬步軍員僚一班次管伴一班並令常起居次引使人詔依

同日禮部太常寺言兩浙轉運使副湯沂申金國使人回程年例於鎮江府賜御筵及平江府姑蘇館常州荆溪館觀燈未審合與不合舉樂并辦鋪設點燈觀看後批送禮部同太常寺看詳中尚書省今看詳除不合舉

樂外所有觀燈即照應年例排辦詔依

紹興三十年十一月一日都省批下兩浙路轉運副使
呂廣問申賀正旦人使回程盱眙軍平江府鎮江府常
州賜御筵未審合與不合作樂綵縛山棚鋪設燈花沿
路陳設用甚顏色後批送禮部太常寺看詳申尚書省
今看詳除不合作樂外既不作樂山棚亦不合綵縛所
有陳設合依自來所用顏色體例其鋪設
燈花即合應去年例排辦詔依

十八日閤門言賀正旦使人見辭賜茶權令尚書正侍
郎觀察使以上赴坐詔依

二十四日閤門言賀正旦使人見辭茶酒依例宣勸權
不宣視蓋詔依

二十八日閣門太常寺言准批送下館伴所狀正旦使人赴西上閣門慰即未審至日甚處差人同通事引揖後批送閣門同太常寺日下指定申尚書省契勘自來文武百僚奉慰立班並依太常寺贊引使臣引揖指引應所有正旦使人同宰臣已下奉慰合係太常寺使臣引揖緣閣門舍人已赴驛習說奉慰儀了當若至日令太常寺使臣引揖竊慮使人疑問今指定欲權令習儀引使副舍人二員同通事引揖赴立班位詔依二十九日閣門言來年正月一日文武百僚并人使赴西上閣門進名奉慰宰臣使相人使合依已降指揮鋪設褥位詔依

三十年正月一日皇帝不受賀文武百僚常服黑帶詣

文德殿立班進名奉慰其金國賀正旦使人隨班奉慰
詔免赴

十一月二十七日禮部太常寺言准都省批送下兵部
申勘會每遇金國使人到闕朝見日依政和五禮新儀
排設黃麾角仗一千五十六人去年金國使人賀正旦
并今年賀天申聖節朝見日並承指揮儀仗權免增添
禁衛所有將來賀正旦使人到闕朝見日排設儀仗批
送禮部同太常寺看詳申尚書省勘會將來賀正旦使
人到闕朝見日排設儀仗緣今年九月二十三日已降
指揮皇帝自十月朔純吉服所有儀仗禮部太常寺看
詳合行排設詔依
十二月十二日詔入使見辭用忌前服仍不設仗

乾道九年十二月十七日閣門言已降指揮遇大使到
闕宴日皇太子內中起居所有來年五月五日紫宸殿
宴欲乞正通文武百僚宰執曾懷已下謝宣召赴宴詔
依

正旦金國使人入賀一

淳熙十一年十月二十日三省樞密院言盱眙軍由承
對境牒報來年賀正旦生辰人使合赴上京緣此間相
去地遠天氣寒冷一行人使往回行從艱難據來歲賀
正旦生辰人使權止一年詔章森等令回行在

淳熙十四年十一月二十一日禮部太常寺言准批
下儀鸞司申今來大行太上皇帝升遐所有將來使人
到闕賀正旦垂拱紫宸殿殿及應合排辦事務本司係

是應奉官司並合預期辦集比之他司事體不同竊慮陳設顏色物料內妨碍名色等本司即未審依與不依昨紹興二十九年排辦紹興三十年正旦使人到闕已降指揮更易陳設顏色體例施行本司遂具奏聞奏聖旨令申尚書省下禮部太常寺討論施行今具下項一紹興二十九年十二月八日禮部太常寺狀准尚書省札子儀鸞司狀備坐到已降指揮禮部太常寺討論到將來金國賀正旦使人到闕日依典故更不賜宴上就驛賜筵外如見辭日賜茶酒依典故不舉樂不絞綵山樓御前裝設如係紅繡等顏色改用黃素臣僚錦座改用紫素本司除已照應施行外緣於本司元奏降已申審狀內開具陳設等名色物件於今來所降指揮內

即未該載無以遵依致本司排辦未得本司今再行開具元申請狀內陳設等下項 一垂拱紫宸兩殿上合赴座臣僚及使副係合用緋羅夾高卓衣子并緋羅夾矮台衣子并殿上幃風後緋羅夾從床衣子拽簾紅結鈎條 一兩朵殿及兩廊倚簷等合用緋羅壁衣額道緋羅夾柱衣并兩廊茶酒屋亦係用緋羅偏釘衣子等 一殿門裏外宰執百官并使副三節人從待班閣子及殿門外賜使酒果幕次並係用緋羅壁衣額道并緋綠簾紅結鈎條釘設兼今來相去正旦日分大段逼近今欲乞再送有司早賜參酌討論數內更有無相妨更易顏色名件逐一開分明指定行下庶得有以遵執預期排辦免致遲悞本司遂具奏聞奉聖旨依奏令申尚

書省下禮部太常寺疾速再行討論也一分明指定行下
伏候指揮十一月二十八日奉聖旨依已得指揮禮部
太常寺討論下項殿上緋羅從床今欲用乞黃素拽簾
紅結鈎條今欲乞用青色或賜茶酒赴座臣僚及副使
臺卓緋羅衣子今欲乞用紫色使副三節人從殿門裏
外待班閤子殿門外賜酒果幕次緋壁衣額道緋緣簾
紅結鈎條今欲乞並用紫色朵殿及兩廊倚簷等并茶
酒屋緋羅壁衣額道夾柱衣今欲乞止用青額道更不
陳設茶酒屋內緋羅偏釘衣子今欲乞用紫色殿門裏
外宰執百官幕次今欲乞用紫緣簾紫額道內府青布
幕隨宜釘設赤岸班荆館都亭驛已降指揮除人使宿
位依故事依舊外餘用青紫陳設伏乞朝廷詳酌指揮

施行伏候指揮十二月八日三省同奉聖旨依禮部太常寺討論到事理施行 一紹興二十九年十二月九日尚書省劄子儀鸞司狀准尚書省劄子節文備生到已降指揮禮部太常寺討論到今來賀正旦金國人使到闕入內見辭等殿裏外所有釘設陳設等其殿上及幃風後從床衣子並改用黃素內拽簾鈎條用青色赴座臣僚及使副人從殿裏外待班間子殿門外賜酒果幕次臺卓衣子壁衣額道簾條並改用紫色並兩朵殿兩廊倚簷等柱壁衣額道止用青額茶酒屋內偏釘衣子亦改用紫殿門裏外宰執百官幕並用紫綠簾紫額道及青布幕隨宜釘設本司契勘前項改用紫青羅絹陳設簾條台卓衣幃物數本司即無庫管今勒合于人

員謝貴等計料到殿裏外合用釘設陳設等實數竊緣
今來相去正旦日分大段逼乞今欲乞指揮臨安府轉
運司同共計會本司交跋樣製前去各分認一半物數
立限製造發納赴司應副供闕准此仍先次施行本司
遂具奏聞奉聖旨並依奏令申尚書省下臨安府兩浙
轉運司兩處製造限五日發納付司一垂拱紫宸兩殿
上并朵殿兩廊及隔門外宰執待班幕次等黃羅夾兩
幅身額五十二道係一幅半瀝水一幅身額四十道係
一幅半瀝水柱衣四十條各四幅腰子瀝水金從床衣
子六條瀝水全紫羅夾高卓子八條矮臺子四十條偏
釘衣子三十條大偏釘衣子六條青絹單一幅半身額
五十道瀝水全紫絹單一幅身額三十道瀝水全紫紬

線結鈎條四十道紫絹綠劈竹簾二十間內一十間六柱一十間五柱青紬線結拽簾條二十一垂拱殿門外待班并賜酒果幕次紫絹單壁衣四十五條各六幅一幅身額六十五道紫絹綠劈竹簾三十二間內一十七間六柱一十五間五柱紫紬線結鈎條三十二條紫羅夾高卓衣子六條勘會今准都省批下儀鸞司申為將來賀正旦更易陳設等事禮部太常寺今檢照昨紹興二十九年排辦三十年正旦使人到闕更易陳設顏色已降指揮開具在前今討論欲乞儀鸞司照應前項已降指揮體例排辦施行詔紫陳設等並改用青餘依十二月十四日詔將來賀正旦人使到闕今于後殿東廊設素幄引見辭賜茶

十九日禮部問門太常寺國信所言准樞密院劄子樞密院奏國信所申檢准淳熙十年十二月十六日樞密院劄子節文樞密院奏國信所申賀正旦使人到闕排日節次事件本所今擬定伏乞朝廷詳酌指揮施行伏候指揮三省樞密院同奉聖旨並依今後准此其大小月分照應自來體例施行劄付所本司勘會今來大行太上皇帝升遐今檢准紹興二十九年十二月六日樞密院劄子節文樞密院奏國信所申准尚書省劄子節文禮部太常寺討論到今來金國賀正旦使人入界依典故逐處今依舊賜宴唯不舉樂景德二年十一月宴契丹使於崇德殿不舉樂今來賀正旦人使見辭依元豐三年典故合宣座賜茶及差執政官就驛押賜御筵

三省樞密院同奉聖旨依劄付國信所疾速施行本所
照得當年金國賀正旦使人到關係顯宗皇后祔廟畢
所有將來排日節次事件本所今開具昨紹興二十九
年十二月六日樞密院劄子續承所屬報到臨時更改
事節各用小貼子聲說訖緣今來大行太上皇帝升遐
未有梓宮發引日分其金國賀正旦使人到關係日節
次事件伏乞朝廷詳酌特降指揮施行淳熙十四年十
二月三日三省樞密院同奉旨令禮部太常寺闕門國
信所同共疾速討論條具聞奏今同共討論條具到國
信所申賀正旦使人到關係日節次事件數內使人見
辭闕門准淳熙十四年十二月十五日尚書省劄子闕
門狀今月十四日奉聖旨將來賀正旦人使到闕令於

後殿設東廊設素帳引見辭賜茶續准尚書劄子十二月十八日三省樞密院同奉聖旨令於後殿東廂設素帳所有正月一日欲乞依紹興二十九年十二月六日樞密院劄子指揮館伴使人入內赴西上閤門慰訖次赴客省茶酒歸驛賜御筵酒果兩府押伴其天竺等處燒香欲乞依紹興三十一年賀天申聖節使人到闕已降指揮體例免赴并今來浙江觀潮亦乞免赴將來賜茶酒齋筵果卓食味等并供送赴驛及玉津園躬弓亦乞依紹興三十一年已降指揮體例止移宴就驛其所賜例物等並於驛中就賜所有其餘排日事件欲並從國信所已申事理施行 十二月二十一日主管官并館伴已下赴赤岸迎接止宿 二十二日主管同管伴

按試御筵節次等止宿 二十三日館伴令通事等押人馬從物遠傳語使人到赤岸入內內侍省差使臣二員賜御宴酒果至晚就仁和館止宿 二十四日北郭稅亭茶酒七盞候到驛就差監門使臣一員賜被褥鈔鋪等館伴請使人排當 二十五日臨安府書送酒食閤門差官就驛習說朝見儀館伴請使人排當 二十六日館伴使人上馬至內門待漏幕次茶酒入內朝見賜衣帶例物赴殿門外幕次客省茶酒訖赴垂拱殿宣坐喫茶畢歸驛承受賜柑子或改換荔枝園荔枝入內內侍省差使臣二員賜御筵酒果兩府押伴放歇泊假三日小貼子稱續據掌儀大臣事聶攸等申使人赴垂拱殿進書朝見訖次宣座喫茶畢出殿所有宣座喫茶

欲乞依典故施行 二十七日入內內侍省差使臣一員賜生餼依例折博館伴請使人排當 二十八日館伴使人已下赴天竺等處燒香排辦素食茶酒承受賜使人乳糖金橘等小貼子稱今來使人赴天竺寺處燒香排辦素食茶酒等合取自朝廷指揮 二十九日入內內侍省差使臣一員賜內中酒果館請使人排當承受賜風藥酒果并餽果乾果子及賜歲夜御酒餽果赴座守歲夜筵 正月一日館伴使人上馬至內門待漏幕次茶酒入內赴西上閣門慰訖次赴客省茶酒歸驛入內內侍省差使臣二員賜御酒果兩府押伴小貼子稱續准館伴所關恭承聖旨令過位親傳旨使人正月一日奉慰免入止就館賜御筵兩府押伴所有來年正

旦伏乞朝廷詳酌指揮施行又稱紹興二十九年十二月二十日使人到平江府遇春入內內侍省差使臣一員賜使人春幡勝春盤所有來年正月一日立春欲乞依例施行初二日在驛承受賜使人上幸祈穀酒果館伴請使人排當小貼子稱來年五月初五日遇上辛欲乞於初五日依例施行初三日入內內侍省差使臣一員賜內中酒果客省簽賜食館伴使人赴浙江亭觀潮排辦茶酒承受賜酒小貼子稱今來使人赴浙江亭觀潮合取自朝廷指揮初四日就驛入內內侍省使臣三員內一員賜使人射弓例物二員賜御筵酒果依例差官押伴小貼子稱續准樞密院劄子節文奉聖旨金國賀正旦人使可特令赴玉津園射弓所有今來

合取自朝廷指揮 初五日就驛入內內侍省差使臣
二員賜御進酒果宰臣押伴閤門差官就驛習說朝辭
儀 初六日館伴使人上馬至內門待漏幕次茶酒入
內朝鮮宣座喫茶依例賜衣帶例物訖使人受國書次
赴殿門外客省茶酒畢歸驛入內內侍省差使臣二員
賜御進酒果兩府押伴就差監厨使臣密賜大銀器具
封進請領國書本所依例關報學士院入內內侍省施
行小貼子稱續據掌儀大通事聶攸等申使人赴垂拱
殿宣座吃茶次朝辭訖受國書所有今來宣座吃茶欲
乞依典故施行又稱續據掌儀大通事聶攸等申北使
副傳語館伴要初六日朝辭初七日早行當日便赴赤
岸御筵續唯尚書省劄子勘會人使初七日起發當日

於赤岸賜御筵割付所關牒施行 初七日館伴請使人排當臨安府盡送贐儀至晚赴座夜筵互相解換館伴面授使人賜目小貼子稱據掌儀大通事聶攸等申臨安府書于初五日書送贐儀訖初六日晚赴座解換夜筵了當 初八日承受賜使人龍鳳茶并金鍍銀合承受傳宣春寒候日高和暖行馬館伴使人上馬至北郭稅亭茶酒訖上船至仁和館止宿小貼子稱續據掌儀大通事聶攸等申使人於初七日起發賜龍鳳茶并金鍍銀合傳宣春寒候日高暖和行馬次上馬至北郭稅亭免赴茶酒至仁和館供晚食畢行船至申時到赤岸赴御座筵畢館伴與使人相別送伴交割前去 初九日赤岸入內侍省差使人臣二員賜御筵酒果差

六曹尚書押伴館送伴同座筵起館伴與使人相別送伴交割前去小貼子稱本所契勘將來使人於初六日朝鮮訖若使人臨時要依昨紹興三十年體例趨日起發續行申取朝廷指揮詔依

二十日臣僚言臣聞禮之能服人也久矣春秋之時魯國有難齊將圖之仲孫湫以魯秉周禮未可以動其後世有夾谷之會齊使萊人以兵亂之孔子相魯接之以禮齊卒成好禮之服人其明驗大效如此哉日者虜使奉會慶節書幣以來我國適有大故陛下方在衰經之初命群臣集議皆曰典故當與之見既而聖意獨斷卻其書幣就館津遣彼亦逡巡退聽而歸此無他禮之所在有以服其心故爾今正旦之使復來其事體與前日

大同而小異外廷臣子皆以陛下方御縞素聽事內殿不知當何以待之忽聞已降指揮見議素幄引見使人令有司議禮物之當受與否則知聖意已有所處然而竊謂彼之前日見却出於倉卒不意今日之來必將深思孰計以相酬酢適又指揮已出萬一彼課而知之或恐以賀正為辭不當於素幄引見欲望陛下預於此日少留聖慮或密大諭臣為蚤正素定之義俟其辭或出此則授館伴從容閑暇以應之無若前日之舉涉於忽遽則為得體矣議者猶以謂我之告留之使已往彼之慰奠之使未來今日之事似有先慶後弔之嫌臣竊謂時先後適然至我是本無意况引見於初到之日至正旦陛下自行禮之大行几筵之前朝會俱罷亦何名為

慶哉國有典故禮有經權參酌其宜自然中節如見管見愚陋何足以仰禪聖明惟墮下財幸取進止詔今來正旦通問專為和好故設素幄許其入見若受禮物則有慶賀之嫌已令館伴卻而不受又慮使人援故事以為諸未審於典禮如何可令禮官詳議以聞

二十四日兼權禮部尚書宇文价等言歷考祖宗以來雖居喪制未有不引見人使亦無不受禮物之文前臣諸臣豈不知不當受而所以不免從權者以為既已通好不當無事而使之疑也今歲賀會慶聖節人使陛下方當哀疚之中卻之使去中外感嘆聖德雖狼子野心亦知委順今正旦人使亦既許御素幄引見受其書矣所有禮物恐無不受之禮况元旦朝會俱罷初無賀儀

幣物所以將書亦非慶典前者聖節之使專以陞下誕辰卻之可也正旦為兩國通好萬一使客必欲加禮而去則徒為紛紜亦恐無辭以欲其物在禮有反經以從權正為是也竊以為當受謹詳議以聞貼黃稱臣等所議若聖斷以為然即乞下館伴使更不必宣諭卻其禮物庶幾不致臨時往復以全國體詔依詳議到事理施行可就殿之東楹設素幄引見人使百官並免果見其禮物毋令入殿付之有司

正旦金國使人入賀二

淳熙十五年十月二十八日儀鸞司申准行在主管往來國信所牒檢准紹興十四年十一月十六日樞密院劄子劄文奉聖旨賀正旦使人赴闕合差賜御筵等官

并應于合行事件令所屬於前兩月檢舉施行所有來
將正旦使人赴關牒司施行本司契勘所承前項牒到
檢舉將來正旦使人到關其應排辦事務本司係是應
奉官司並合預期辦集比之它施事體不同即未審垂
拱紫宸兩殿并兩廊及殿門裏外宰執百官使人三節
人從待班閣子并賜酒果幕次陳設座物拜褥等各合
用是何顏色物帛釘設排辦申寺乞詳酌前項所申事
理以賜逐一契勘指定行下貴憑遵執排辦施行本司
將來正旦使人到關所有殿兩廊及殿門裏外宰執百
官使人三節人從待班閣子并賜酒果幕次陳設座物
并待班人三節人從待班閣子并賜酒果幕次陳設座物
聖節使人到關創釘設排辦
十一月四日禮部太常寺言檢准紹興三十年十月十
一日勅節文禮部太常寺申檢准明德皇后典故景德

三年春正月甲辰朔上不受朝群臣詣闕拜表稱賀契
勘前項典故係在明德皇后小祥之後遇正月朔上不
受朝羣臣詣闕拜表稱賀所有紹興三十年十一月十
六日冬至并三十一年正旦亦係在顯仁皇后小祥之
後依前件典故各於是日皇帝不受朝宰臣率文武百
僚拜表稱賀十月十一日三省同奉聖旨並免拜表稱
賀契勘今來十一月二十五日冬至并來年正旦係在
高宗皇帝小祥之後緣有前項典故指揮詔權免

十二月十八日樞密院劄子奏國信所申契勘今來正
旦金國使人到闕排日節次事件本所今將淳熙十五
年正旦并近會慶節例參酌比擬到排日下項 十二
月二十二日主管官并館伴已下赴赤岸迎接止宿

二十三日主管官同館伴按試御筵節次等止宿 二
十四日館伴令通事等押人馬從物速傳語使人到赤
岸入內內省差使臣二員賜御宴酒果至晚就仁和館
止宿二十五日北郭稅亭茶酒七盞候到驛就差監門
使臣一員賜被褥鈔銀等館伴請使人排當 二十六
日臨安府書送酒食閤門差官就驛習說朝見儀館伴
請使人排當 二十七日館伴使人上馬至內門待漏
幕次茶酒入內朝見賜衣帶劔物赴門殿外幕次客省
茶酒訖赴垂拱殿宣座吃茶畢歸驛承受賜柑子或改
換荔枝圓荔枝入內內侍省差使臣二員賜御筵酒果
兩府押拌放歇泊假三日小貼子稱淳熙十五年正旦
并會慶聖節使人朝見訖其兩次歸驛賜御筵使人辭

免並不曾赴座所有今來正旦使人赴闕歸驛賜御筵
欲乞准脩施行 二十八日入內內侍省差使臣一員
賜生饌依例折博館伴請使人排當 二十九日館伴
使人已下赴天竺寺等處燒香排辦素食茶酒承受賜
使人乳糖金橘等 三十日入內內侍省差使臣一員
賜內中酒果館伴請使人排當承受賜風藥并錫果乾
果子等賜歲夜御酒錫果赴座守歲夜筵 正月初一
日依例免入賀入內內侍省差使臣二員就譯賜御筵
酒果兩府押班 初二日在譯館伴請使人排當 初
三日入內內侍省差使臣一員賜內中酒果客省簽賜
酒食館伴赴浙江亭觀潮排辦茶酒承受賜酒果 初
四日館伴使人赴玉津園射弓差官伴射管領入內內

侍省差使臣四員賜御筵酒果弓箭例物 初五日就
驛入內侍省差使臣二員賜御筵酒果宰臣押伴閤
門差官就驛習說朝辭儀將來正月十日遇上辛緣使
人已回程沿途所有承受賜祈殷酒果本所欲依條例
於初五日作時寒賜值雪作時雪賜小貼子稱淳熙十
五年正旦正月五日并會慶聖節十月二十四日就驛
賜御筵使人辭免續得旨並免所有今來正旦使人赴
閤就驛賜御筵欲乞准備施行 初六日管伴使人上
馬至內門待漏幕次茶酒入內朝辭宣座吃茶依例賜
衣帶例物訖使人受國書次起殿門外客省茶酒畢歸
驛入內侍省差使臣二員賜御筵酒果兩府押伴就
差監廚使臣一員密賜大銀器其封進請令國書本所

依例關報學士院入內內侍省施行 初七日管伴請
使人排當臨安府書送贐儀至晚赴座夜筵互相解換
館伴面授使人賜目 初八日承受賜使人龍鳳茶金
銀合并傳宣春寒候日高和暖行馬館伴使人上馬
至北郭稅亭茶酒訖上船至仁和館止宿 初九日赤
岸入內內侍省使臣二員賜御筵酒果差六曹尚書押
伴館伴送伴同座筵起館伴與使人相別送伴交割前
去詔依

中禮禮書第二百二十七卷

賓禮六

占城

紹興二十五年十月二日禮部兵部言准都省劄勘會
占城國已降指揮許入其使副已到泉州竊慮非晚
到闕所有合回賜錢物及應合行事件劄付禮部等處
檢具申取朝廷指揮逐部會勘除就懷遠驛安泊及令
客省定賜例物等項目并依得交趾體例施行外所有
其餘合行事件開具下項一鴻臚寺條諸番夷進奉
人回乞差樁擎防護兵士并相度合用人數關步軍司
差今來占城國人貢到闕回程合差樁擎防護兵士欲
依條下步軍司差撥三十人內節級一名赴本驛交割

俟至臨安府界即令以次州軍差人交替令押取于未起發以前預報沿路州軍差人在界首祇備交替一主客條例占城國進奉回賜外別賜翠毛細法錦夾袄子一領二十兩金腰帶一條銀器二百兩衣著絹三百匹白馬一匹八十兩開粧銀鞍轡一副下户工部令所屬計料製造送客省樁辦依自來條例回賜其馬騾令驛院給賜詔依

八日客省言將來占城國進奉使副到闕在驛禮數儀範今條具下項 一進奉使副與押伴官相見其日進奉使副到驛歸位次客省承受引驛語赴押伴位參押伴復作押伴問遠來不易參訖譯語作進奉使副傳語押伴官訖退客者承受同譯語入進奉使副位次使副

起立與客省承受相見揖訖客省承受作押伴官回傳
語進奉使副遠涉不易喜得到來少頃即得被見次客
省承受引首領赴押伴位參復作押伴問遠來不易參
訖退客省承受次撥人從參押排客省承受唱在路不
易參訖退譯語齋進奉使副名銜分付客省承受轉押
伴訖復請押伴傳銜分付譯語訖少頃客省承受引押
伴官同進奉使副陞廳對立客省承受互展狀相見訖
揖各赴坐點茶畢客省承受唱入卓子五盞酒食畢客
省承受唱徹卓子次點湯畢押伴官進奉使副相揖畢
分位一習見朝儀其日候閣門差人赴驛教習儀範同
客省承受先見押伴訖計會驛語請進奉使副服本色
服次客省承受同驛詔引教習儀範入相揖朝見儀訖

相揖畢退朝辭准此 一朝見其日五更客省承受計會譯語請進奉使副上馬次押押官與進奉使副相揖畢行馬首領於門外上馬至待漏閣於下馬俟開內門押伴官進奉使副上馬至皇城門裡宮門外下馬至殿門外幕次待班其首領以下步行入皇城門俟閣門報班引進奉使副出幕次入殿朝見拜數禮儀弄如閣門儀俟朝見畢閣門引進奉使副出殿客省承受接引歸幕次客省承受引押伴賜舍人押伴官進奉使副對立相揖畢客省承受贊坐點茶畢客省承受喝入卓子酒食畢客省承受喝徹卓子點湯畢客省承受引伴賜舍人與進奉使副相揖畢伴賜舍人先退次押伴官進奉使副相揖畢引至宮門外上馬首領已下步行出皇城

門外上馬歸驛朝辭准此 一在驛客省簽賜節料節儀其日候客省承受齎到賜目押管所賜節料等到驛客省承受先報押伴訖于設廳前望闕鋪設所賜物客省承受引進奉使副立定引進奉使副拜賜目跪受訖次引首領以下拜賜目跪受賜訖退 一御筵其日候賜御筵天使到驛諸司排辦脩客省承受取進奉使副名銜轉押伴看訖納天使復取賜御筵天使傳言分付驛語少頃客省承受引天使押伴官進奉使副降階對立定客省承受先引押伴官望闕謝恩如儀畢引依位立次引進奉使副謝恩畢如儀畢引依位立天使與進奉使副相揖畢天使先退次押伴官與進奉使副相揖畢引押伴官進奉使副升所席後立客省承受撥首領

已下謝恩如儀訖赴席後立客省承受上所贊揖赴坐
 點茶畢行酒候酒食畢客省承受唱徹卓子點湯畢引
 首領下已下謝恩客省承受贊席後立候首領已下謝
 恩如儀畢客省承授引押伴官進奉使副降階對立定
 先引押伴官謝恩如儀畢引依位立次引進奉使副謝
 恩如儀畢引依位立客使承受引天使依前位立進奉
 使副令譯語跪執謝表拜訖進奉使副以表跪授天使
 訖引依位立與天使相揖畢天使進次押位官進奉使
 副相揖畢引分位一起發日進奉使副與押伴官相
 別其日就驛酒食五盞畢客省承受引押伴官進奉使
 副對立定客省承受轉狀相別訖分位客省承受引
 首領已下辭押伴并如參押伴儀畢次伴送使臣交割

起發前去

同日詔占城進奉人到闕在驛主管諸司官就差監驛官與臨安府排辦事務官同共管幹疾速施行

二十八日四方館言將來占城國進奉人到闕遇大禮其使副并大小首領并合起赴郊壇陪位及登門肆赦稱賀詔依

十一月一日客省言潮梅州巡轄馬遞鋪押伴占城奉使韓全狀今月十二日押伴進奉人到建州約十一月六日到闕及會問使副以下職位姓名稱呼等第下項
一進奉使部領姓薩名達麻呼部領是官資 一進奉使副滂姓摩名加奪呼滂是官資 一判官姓蒲名都網呼大盤是官資 一蒲翁團翁但翁加艷翁邀翁

僚亞辛沙唱呢累已上八名係在番幹辦掌執人 一
翁儒翁雞翁廖蟻蟪亞哪不隊班兒麻菱日罕以上九
名係親隨防護禮物人詔劉下押伴所懷遠驛臨安府
疾速排辦

三日客省言占城國入貢其進奉入非晚到闕今具合
行排辦事下項 一欲乞候進奉人到闕客省就驛置
局主管事務 一今來進奉人候報到至國門日分客
省承受同合用人從鞍馬等出城幕次內計會引伴使
臣祇備使用候入城到驛與押伴相見茶湯畢排辦酒
食五筵訖分位所有相見酒食五蓋令在驛御厨翰林
司隨宜供應排辦其城外幕次令臨安府於經由入國
門外側近去處訂設排辦 一所有朝見日分欲乞候

本省取到進奉人榜子具奏取旨引見及朝辭日分依此施行所有皇城門外待漏幕次什物等欲乞從本省關報儀鸞司排辦釘設 一進奉人起發日就驛排辦酒食五盞押伴送官相別訖進奉人交付伴送使臣起發前去所有酒食五盞令在驛厨翰林司排辦供應詔依

五日客省言據押伴占城進奉使臣韓全申到進奉人姓名共二十人并驛語二人本省契勘押伴并進奉人合用鞍馬共二十四匹乞下馬軍司差撥詔依

六日客省言占城番使却領薩達麻狀昨蒙番王遣同綱首領陳惟安領貢奉物色并章表前來本朝進奉竊念達麻等係化外不諳天朝禮儀全藉綱首陳惟安遞

年興販本番譯語至熟正音兩通兼與番王知熟今次
說諭番王前來進奉方物表內明指陳惟安引進雖有
譯語隨行竊慮傳聞不盡禮節乖違兼緣貢奉物色亦
是陳惟安同共齎領前來欲乞申明朝廷取旨放令陳
惟安同達麻等入驛宿泊庶圖引進及傳聞言音候指
詔依

九日客省言占城進奉使薩達麻等已於今月六日到
驛訖所有朝見日取聖旨詔用十三日

十一日客省言占城使副見辭係宣贊舍人引揖拜跪
緣言語不通見有隨行驛語二人乞下皇城司給入殿
門號并壇殿各二道隨逐進奉人入殿譯語并赴圓壇
陪位立班詔依

十三日詔占城進奉使薩達麻等入見命客省官賜酒食於殿門外如儀

十五日學士院咨報尚書省准御封降下客省奏連到占城國王鄒時芭蘭章表令本院降詔回答當院契勘自來未曾行過占城國詔勅書外所有交趾國進奉方物等止是給降勅書用五色銷金綾紙書寫進呈請寶降下用黃絹夾複裏定間金鍍裝匣盛鎖鑰紅絲條封全仍將錦裏再用黃絹夾複封裏白絹面簽上題寫勅交趾郡王姓名請寶降下方行發付禮部前去所有今來回答占城國詔即未敢便依交趾國用勅書及封裏體例及契勘交趾占城國自渡江後來未曾遣使到闕所有今來回賜勅書如封裏進呈了當即未當依大金

遣使到闕體例于使副朝辭前進納候朝辭日御前給
賜唯復從本院齋赴懷遠驛押伴官處交付取自朝廷
指揮後批送部禮戶部看詳申尚書省二十八年八月
士院判官占城國王章表令本院降詔回若送部看詳
行下太常寺看詳本寺契勘今降詔回若送部看詳
除本寺即與典故給外今體看創制度候學士院檢呈
交趾國進奉方物給降勅書今體看創制度候學士院檢呈
送學士院一就帶赴前去姑依
所令使到一就帶赴前去姑依

十六日賜占城進奉薩達麻等御筵於懷遠驛

二十一日戶部言太府寺申占城人使到闕所有回賜

錢物准紹興二十五年十月二日指揮候見得所進物

色價直刻刷參酌應付其人使雖到行在緣所進物色

尚在泉州并未起發依照寧六年指揮今後諸番進奉

如有進奉物色令本寺看估計價下所屬回賜今將所

進香貨名次下所屬勘估細計得香貨等錢十萬七千
餘貫本寺刻刷回賜物帛數目乞下所屬支給閑報客
省回賜今具下項 一占城進奉到物沉香九百五十
六斤附子沉香一百五十斤箋香四千五百二十八斤
連香四千八百九十斤象牙一百六十八株三千五百
二十六斤澳香三百斤犀角二十株玳瑁六十斤暫香
一百二十斤細割香一百八十斤翠毛三百六十隻番
油一十埕烏里里香五萬五千二十斤 一回答數目
錦三百五十斤生川綾二百斤生川壓羅四十斤生桴
蒲綾四十斤生川尅絲一百斤離色綾一千斤離色羅
一千斤熟桴羅綾五百斤江南絹三千斤銀一萬兩詔
依

二十二日客省言占城進奉人到闕別賜國信物色翠毛細法錦夾袄子金腰帶銀器等已下所屬製造訖乞送祇候庫打角學士院封題請定訖附客省送押伴所詔依

同日客省言福建市舶司差到使臣韓全等八人押伴占城進奉人到闕回日可就差伴送前去詔依

二十六日鈐鑄鈞容直所言占城入貢起發前一日就驛賜御筵依例係九盞節次合用樂人作樂緣今降指揮內止令鈞容直隨宜量度差撥今乞差本班五十人作樂祇應其合用勾曲念語令本班應制制撰詔依今後准此

二十七日客省言今具下項 一引伴占城進奉人使

臣韓全等八人并驛語二人已就差伴送前去特與等第犒設一次使臣韓全等一百貫與占射差遣一次令吏部給據詳語二人衙前一名各五十貫手分一名三十貫軍兵五人各一十五貫并令戶部支給一占城進奉人到闕押伴官與依館伴金國使副例減半支給絹各一百疋兩充收買私覲客省官置局主管與依國信所主管官例減半每員支銀銷各二十五疋兩并令戶部支給其當行房分折食錢令臨安府依金國人使到闕例減半支給詔依

同日客省言占城進奉使薩達麻等狀欲乞早賜發遣本省契勘所有朝辭日取聖旨詔令十二月三日朝辭

二十八日客省言占城進奉人回程其沿路差破遞馬宿泊飲食等并乞依引伴來程體例詔依

乾道三年十一月二十八日提舉福建路市舶程祐之言本司元勸發占城番興拜網首陳應等舡已回舶分載正副使楊卜薩達麻等并隨行人計一十二名已照應入貢體例差官引伴于來遞驛安泊其附到進貢乳香象牙沉香等數目合無依紹興二十五年指揮許令將所貢物貨計綱隨遞進奉人使赴闕及提使副薩達麻等齎到本番首鄒亞娜表章番字一本唐字一本及唐字物貨數一本又據大食國烏師點等狀本國得財主佛記霞羅池各條寶貝乳香象牙等赴大宋進奉到占城國外洋暫駐有占城番首差土生唐人及番人

打駕小舡招引佛記霞囉池等入占城國拘管將進奉
寶貨盡數般上只撥得乳香象牙與烏師點等却差他
國番人作已物前來進奉又將人命殺害委寔痛傷欲
乞備申朝廷施行候指揮勘已降指揮據所貢物以十
分為率許進奉一分餘數依條例抽買奉聖旨進奉一
物物色既有爭訟難以收受可給還令程祐之說諭以
理遣回所有其餘物貨令市船司斟量依條抽買